



Lorena Bikker • Makiyahe y Cabey: Bruce Stamper • Shimis: BCBGMAXAZRIA • Acesorio: Rage • Andin Bikker • Trahe: Hugo Boss • Localidad: Tierra del Sol • Fotografo: Jimenez Photography

“Politica pa mi ta mas bien un yamada di nos Creador pa mi uza mi estudio y preparacion pa sirbi nos Pueblo”

Desde cu el a tuma e decision di drenta politica, Lorena a percura pa brinda sosten incondicional na Andin. Un matrimonio cu lo celebra su 10 aniversario dia 11 di october proximo, cu ta bendiciona cu 2 yiu muhe; Tiffany Alisha (9) y Aliah C. Gabriella (2). E combinacion di abogado, parlamentario, tata y casa, ta pone Andin sinti un responsabilidad grandi como ser masculino, ehecutando cada funcion mas miho cu ta posibel. Aña 2013 ta crucial, ya cu eleccion ta tuma luga y Andin tin hopi meta y vision cu e kier logra pa su dushi pais Aruba. Y awo pa prome biaha, Andin ta habri porta pa conta Focus y su lectornan un poco mas di dje.



E piano na residencia di Irena Bikker, unda e famia ta reuni pa scucha Andin toca piano y awor Aliah tambe ta sigui e pasonan di su tata

Lorena Bikker • Shimis: BOBGMAXAZRIA • Acesorio: Rage • Andin Bikker • Trahe: Hugo Boss • Tiffany y Aliah • Acesorio: Rage

Con bo ta ehecuta bo rol di tata?

Prome cu mi a bira tata, hopi biaha mi tabata traha straight sin importa e ora of dia, pero desde cu mi a bira tata, mi ta percura, sin importa con druk mi agenda ta, pa dedica tempo na mi yiunan. Tambe mi ta purba dedica maske ta un par di ora riba diasabra mainta na Tiffany y Aliah y reserva, te unda cu por, diadomingo pa pasa cu nan y mi señora Lorena. Awor cu e campaña electoral 2013 a cuminsa, e ta bira mas dificil pa dedica tempo na famia, pero esey ta parti di e sacrificionan cu bo tin cu haci como politico activo.

Kico ta e actividad familiar cu mas bo ta gusta haci?

Ora tin un poco espacio den agenda riba diadomingo mi ta gusta haci barbecue pa famia. E muchanan ta gusta, paso nos ta comparti cu nan wela, nos ta pone musica pafor y nan ta hunga den cura bou di e palo di mango, caminda tin un zandbak y schommel.

“Mi ta sigui e ehempel di mi mayornan, caminda mi ta zorg, conhuntamente cu mi casa Lorena, pa pone un base di fe Cristiano como fundamento di norma- y balornan y adicionalmente stress hopi pa duna un bon ehempel, mustra respet y riba e importancia di studia bon na scol.”

Bo ta haya cu un mucha mester lanta cu influencia y presencia di su tata?

Mi ta di opinion cu e rol primordial di un famia cu tin yiu ta, pa fungi como e circulo di proteccion y ta un ehempel pa lanta e yiunan. Na mes momento mi ta consciente cu Aruba conoce hopi famia, cu pa motibo di circunstancia di bida, ta consisti di mama soltero. Si esey ta e caso, mi ta kere cu e tata mester keda hunga un rol ehemplar den e criansa di su yiunan y no mester negligha e responsabilidad aki.

Pasco 2001 ta uno special y memorabel pa Andin y Lorena, ya cu esey ta e dia cu nan a cera conoci cu otro y despues di comparti algun tempo como pareha, nan a dicidi di formalisa nan relacion, casando dia 11 di october 2003 na Las Vegas, Merca. Andin ta considera Lorena como un otro bendicion cu Dios a manda p'e, ya cu banda di a dun'e nan dos yiunan stima, el a trece un estabilidad pa Andin por logra su metanan. Andin ta stim'e hopi y ta masha gradici pa e forma cu e ta yuda cria y lanta nan yiunan, sin kita tur e sosten y comprension cu Lorena tin cu ne.

'Bira tata' a cambia Andin Bikker su bida den area profesional, personal y social?

Paternidad pa mi ta un di e bendicionnan mas bunita cu Dios a duna mi. Mi ta feliz y orguyoso di nos dos yiunan; Tiffany y Aliah, kendenan ta trece hopi alegria den mi bida y cada bes cu un simpel sonrisa di nan, ta pone mi lubida cualquier preocupacion cu mi por tin. Paternidad ta subraya y ta haci bo mas consciente di bo responsabilidadnan como tata di famia.

Na Hulanda e lider di PVDA, Wouter Bos, a retira di politica, pasobra e tabata kier a duna mas atencion na su yiunan chikito cu ta creciendo, abo lo considera un paso asina den bo carera politico?

Mi a funda Partido Democracia Real casi 9 aña pasa, mientras cu mi yiu mayor tabatin apenas un par di luna naci. Door cu mi ta percura, pa no obstante con druk mi agenda ta pa traha tempo pa mi yiunan, te awor, mi no a sinti cu mi yiunan ta carece di atencion pa motibo di politica. Claro cu tin momento cu nan ta sinti cu nan tin cu comparti mi cu mas hende, pero semper mi señora Lorena y mi mama ta yuda mi pa e muchanan compronde e aspectonan aki di mi funcion como politico. Mi ta hopi gradici na mi famia pa e sosten cu nan ta duna mi.

Ken ta inspira bo como politico?

Mi a wordo hopi inspira desde chikito pa Betico Croes. Pero tambe p'e lidernan internacional manera; Winston Churchill, Ronald Reagan, Bill Clinton y Barack Obama.

Kico ta bo vision como politico hoben?

Dado momento mi a constata cu e politica aki na Aruba ta hopi polarisa entre e dos partidonan tradicional, esta MEP y AVP, caminda hopi biaha nan ta critica otro na un nivel hopi personal riba un of otro topico cu no ta canando bon y hopi biaha sin cu nan ta presenta un solucion concreto. Mi manera di hiba politica ta mantene un nivel profesional, caminda cu mi ta señala un problema cu mester atencion y na mes momento mi ta presenta un posibel solucion concreto, sea pa medio di un propuesta di ley, un amienda riba un ley, un sugerencia pa cambio den maneho of un mocion. Cu e vision ey Democracia Real a logra cosnan grandi for di oposicion cu apenas 1 asiento.

“E manera di hiba politica di Democracia Real, cu a duna su frutonan di varios logro concreto, ta hayando mas y mas aprecio den comunidad y ta pone cu den e proximo eleccion Democracia Real ta bay ta E alternativa pa esnan cu ta cansa di duna mandato absoluto na sea signatura berde of geel.”





Lorena Bikker • Shimis: Hugo Boss • Acesorio: Rage • Andin Bikker • Outfit: Hugo Boss • Localidad: Parque Nacional Arikok • Mueble: Home & Nature

Den e añanan den politica, ki cambianan bo ta mira y ki falta pa cambia den e sistema politico na Aruba?

Door cu e ultimo 3 gabinetenan tabata tin mandato absoluto, nos Democracia Parlamentario no ta funcionando manera mester ta y den mi opinion; e ta den coma. Por a nota cu cada bes e fraccion mayoritario den Parlamento ta practicamente obstaculisa e funcionamiento di Parlamento door di ta mucho na merced di gobierno. Un ehempel palpabel ta e hecho cu e presupuesto 2013 a wordo entrega como 8 luna laat na Parlamento y e fraccion mayoritario a dicidi cu Parlamento ta haya apenas 6 dia di trabou pa studia esaki y haci pregunta. Asina nan ta mina un di e derechonan mas fundamental di Parlamento, cu ta controla con gobierno ta aloca y gasta fondonan publico (e asina yama "budgetrecht"). Cada eleccion bo ta tende e candidatonan di e partidonan tradicional ta priminti Pueblo cu nan ta bay drecha e funcionamiento di Parlamento, pero tur ora ta resulta di ta promesanan fofu.

Di nos banda nos no a keda na promesa: Democracia Real a entrega un proposicion pa un 'Reglement van Orde' nobo cu lo yuda eleva e nivel den Parlamento y nos fraccion semper a mantene un nivel profesional y al caso den Parlamento.

E trabou como parlamentario ta loke bo pa spera cu e lo ta?

Ki ta e desafionan mirando cu bo a laga temporalmente bo exitoso carera como abogado pa eherce un funcion publico?

Door cu e Democracia Parlamentario no ta funcionando manera debe ser y e partidonan tradicional hopi biaha ta hiba un politica na un nivel hopi abou, enberdad sa pasa cu tin biaha mi ta bay reunion di Parlamento cu sentimentonan mixto. Pero na mes momento mi ta corda mi mes, cu si mi no duna e ehempel con ta posibel pa funciona na un nivel mas profesional den Parlamento, e ora nada lo cambia. Loke ta yuda ta cu mi manera di hiba politica ta trece cu ne cu hopi biaha mi ta presenta posibel solucionnan den forma di propuesta di ley of amienda, y traha riba concepto di ley of amienda ta algo cu mi ta gusta haci.

Na diferente parti di mundo e salario y compensacion di e minister- y parlamentarionan ta astronomico, mirando e crisis economico cu nos ta aden, bo ta hay'e hustifica?

Esey ta un topico cu dificil por haya un consensus riba dje. Loke ta lubida aki na Aruba

ta, cu hopi biaha e personanan cu ta wordo mira como politico potencial ("votegetters"), ya tin un bon salario, pues pa nan drenta politica hasta ta bira un sacrificio di entrada pa nan y nan famia. Den mi caso, por ehempel, e salario no ta un motivacion pa mi ta den politica, como abogado reconoci mi por gana un salario mas halto. Politica pa mi ta mas bien un yamada di nos Creador pa mi uza mi estudio y preparacion como entre otro kandidaat-notaris y abogado, pues mi conocimiento amplio di e leyman, pa sirbi nos Pueblo. Apart di sirbi nos Pueblo como politico mi tin 6 aña caba cu mi a lanta Fundacion Pro Justicia, unda tur siman mi ta atende gratuitamente esnan cu no por paga pa conseho huridico. Den su 6 aña di existencia FPJ a atende y yuda miles di persona y tur siman tin como 60 pa 70 hende ta acudi na e consultanan cu ta wordo duna tur diahuebs atardi na Noord y desde mei 2013 tambe tur diamars atardi na San Nicolas.

“Mi ta kere fervientemente den nos Creador y cu nos tur a bin na e mundo aki cu un proposito. Mi ta sinti y m’a demostra cu mi proposito den bida grandemente ta centra den yuda pa medio di mi conocimiento y estudio y pa yuda mi prohimo y forma un mihor pais.”

Kico ta bo conseho como politico pa henter pueblo di Aruba pa ora di votacion? Con bo ta premira eleccion 2013?

Loke mi por remarca ta cu e encuestanan ta muestra claramente cu un parti substancial di votador, ta cansa di loke mi ta yama; e wegá di ping pong entre MEP cu AVP. Hopi votador kier duna Democracia Real un oportunidad pa por forma parti di e proximo gobernacion. Mi ta premira cu e proximo gobernacion ta bay ta un coalicion caminda Democracia Real lo bay hunga un rol importante, paso segun varios encuesta ni MEP ni AVP no ta bay haya un mayoria absoluto.

Con bo ta desea pa e hendenan keda corda bo?

Mi ta kere cu si bo wordo recorda pa esnan cu ta stima bo of tin aprecio pa bo como un bon persona, sea den bo calidad di por ehempel tata, esposo, ruman, amigo, socio, colega of bisiña, esey ta bal mas cu wordo recorda pa cualkier otro logro den bo bida. Pa mi esey ta importante y cu ora mi bandona e mundo aki e propositonan noble pa cual nos Creador a duna mi bida, a wordo logra.